

84(2Рос = Коми) - 5

8. П58

Номи республиканская
библиотека им. В. И. Ленина
КРАЕВЕДЧЕСКИЙ ДЕП.ЗМУ.РИИ



БЕРАФИМ ПОПОВ

**ЩУГÖРСА
ЗОН**




Листок срока возврата книг

**КНИГА ДОЛЖНА БЫТЬ
ВОЗВРАЩЕНА НЕ ПОЗЖЕ**
указанного здесь срока

--	--

231






СЕРАФИМ
ПОПОВ

ЩУГÖРСА ЗОН



ПОЭМАЯС



389659

НАЦИОНАЛЬНАЯ ДЕТСКАЯ
БИБЛИОТЕКА РЕСПУБЛИКИ КОМИ
ИМ. С.Я.МАРШАКА
167981, г. Сыктывкар, Советская, 20

КОМИ КНИЖНОЙ ИЗДАТЕЛЬСТВО
СЫКТЫВКАР 1968

Дона челядь!

Коми поэт Серафим Алексеевич Попов тайӧ книжкаас йӧзӧдӧ куим поэма, кодъясӧс 1967 воын челядьлы медбур гижӧд вылӧ республиканскӧй конкурс вылын вӧлі пасйӧма первой премияӧн. Куимнан гижӧдыслӧн шӧр визьыс — чужан му радейтӧм, патриотизм, Рӧдинаӧс дорйыны да видзны коланлун. Куимнан гижӧдас геройясыс — олӧмысь босьтӧм йӧз. Куимнан гижӧдас петкӧдлӧма подвигсӧ налысь, кодлы дона да матыса йӧзлӧн шудыс, миян Сӧвет властьюм. Поэт кӧсйӧ, медым и тӧянлы, быдмысь войтыр, вӧлі дона сійӧ,

Кодӧс Рӧдинаӧн шуам,
Дона челядь, ми.
Сійӧ став му шарлы нуӧ
Вылӧ олӧмлысь би.

Поэмаяссӧ, кызди асьныд аддзанныд лыддьӧм бӧрас, гижӧма пӧся, став сьӧлӧмсянь, кыпыда, бурӧ эскӧмӧн. Чайтам, гижӧдъясыс тӧянлы воасны сьӧлӧм вылӧ.

Корам тӧянӧс гижны асьыныд мӧвпъяснытӧ поэмаяс йывсьыс миянлы. Адресным: Сыктывкар, Печать керка, Коми книжнӧй издательство.



ЩУГӨРСА ЗОН

1

Пуксьöй, челядь, ыджыд кытшö,
Сэсса ланьтöй тi.
Чайта, кывзыны оз дышöд
Öти ыджыд висьт.
Регыд воас югыд праздник —
Миян Гөрд Октябрь.
Асья кыаысь на ярджык
Сылөн биа флаг.
Тiян том олөмныд шуда,
Ставыс тырмö, эм,
Сöмын аттьöавны кужöй

Ассыныд бур нэм;
Быдмөй, велөдчөй да бөрйөй
Сьөлөм серти удж,
Кужөй лыддысьны и гөрны,
Радейтны бур мудз.
Петас тиянысь учёнөй,
Врач и инженер.
Ставлы өтмоз лоо дона
Чужан мулөн эрд,
Кодос Рөдинаөн шуам,
Дона челядь, ми.
Сійө став му шарлы нуо
Выль олөмлысь би.
Некор вунөдлытөг колө
Төдны сылысь дон...

2

Коми муын коркө оліс
Тіян кодь жө зон...
Сійө вөлі сюсь да тэрыб,
Вөр-ва шуднас рад,
Но эз тувсов шоныд зэрөн
Мусө мыськы кад.
Шонді петалис, но сёйис
Сійөс кымөр йир.
Кырныш чукөр татчө воис
Кисьтны йөзлысь вир.
Эжвасянь Печора вожөдз
Сатшис сылөн гыж.
Кык кузь төв да кык кузь гожөм
Кыссис чорыд тыш.
Төдны, челядь, бура колө
Мездлуныдлысь дон...
Щугөр сиктын сэки-й оліс
Дас арөса зон.
Лок вай, Костя Никифоров,
Татчө өні лок!
Но оз кыв Печора дорысь
Тіян дона вок...

Изъяс костод кывтö Щугөр,
 Вильшасьöмнас збой,
 Койö сөстөм асья югөр
 Сылөн эзысь войт.
 Мыйла талун öшинь дорас
 Костя вывті рам
 И оз кыв, көть сійөс корö
 Аслас муса мам?
 Батьыс котөртис комбедö,
 Мыйкө дыр оз лок...
 Ичөт сьөлөмлы тшөтш шедö
 Чужан сиктлөн шог.
 Сійөс тшыглун дойдö-личкө,
 Куйлө уджтөг пань.
 Бара некодлөн эз вичмы
 Тулыс кежлө нянь.
 Закар Егорлөн, дерт, тырмө,—
 Удждысьны оз пет,
 Киыс жытник бердас сырмө,
 Весиг кыд оз сет.
 — Босьтам!—
 Шуис зонлөн батьыс.
 — Тадз вöчас комбед:
 Небыд көвдумыд быд пачын
 Öтчыд лоас мед!..
 Костя төдö, ставсö төдö,
 Отсасьны тшөтш дась.
 Овны медводдза во мөдиc
 Гöль войтырлөн власть.
 Щугөр сайын кырныш чукөр
 Гартчö лун и вой.
 Закар Егор сылы юкө
 Гуся лөг да дой.
 Котөрт, Костя, öдйö котөрт,
 Батьлы юөр ну!
 Аддзан, звермөм кулак котыр
 Вуджö Щугөр ю.
 Оз öд вывті ыджыд радлун
 Сійö татчö вай:
 Водзас восьлалö урадник —
 Öгаш Микулай!

Костя уськөдчис...

— Тэ кытчө?—

Равөстис бандит.

— Висьтав меным, ичөт кычан,
Кодлөн лоан пи?

Закар Егор зонмөс төдө:

Тайө сылөн ай

Ыджыд жытникъяссыс мөдіс

Гольлы корсьны пай.

— Мама-пиаөс ми... рытнас!..—

Чөвтис мөд бандит.

— Нолтось, няньтө юклө кытөн

Тиян коммунист?

Щугөр бөрдө, Щугөр ойзө,

Воштіс шуд да мир,

Шомпол йылөн вөчөм дойысь

Муө киссьө вир.

Өкмыс кырнышкөд тшөтш орччөн

Кывтө сөт да мать.

Костя писө синнас корсьө

Никифоров-бать.

Кисө көрталісны сылысь,

Нетшкисны быд кизь.

Өкмыс шыкклөн өкмыс йылын

Өкмыс югыд визь.

Но эз копырт батысь юрсө,

Прөща кыв эз кор...

Йөла шыөн төвзис нюрсянь

Өкмыс биа ствольысь вурсьөм,

Өкмыс лыйөм гор.

Щугөр бөрдө, Щугөр ойзө,

Сылөн шог оз ям.

Батьлысь сывъялісны шойсө

Ичөт пи да мам.

Сылөн русыд юрси пратьөн

Ворсө вильыш төв.

Кырныш чукөр нуис татысь

Быд керкаысь чөв.

Воддза рытнас — весьтас йөрөд!—
Сёрмыны эз позы!—
Мама-пиаос съод вöрын
Дзевис пашкыр коз.
Мамлөн синва шорөн тюрö,
Зонлөн синмыс кос.
Сыысь, чужис нин мый юрас,
Нинöмысь оз кос.
Ичöt кабыр — зумыд гөрöд,
Биөн öзийö сям.
— Гөрд отрядö меным пöра
Мунны, мам!..
Мамсö пыр на пöдтö синва.
— Костя, ланьт... Ог лэдз!..
— Съөлöм пытшкын бательөн нимöн
Корся нянь и мезд!..
Уна дзоридза лөнъ эрдын
Ещö öти гу.
Костя копыртчис сы бердö,
Окалис пöсь му.

6

Чужан муын тшыг и кöдзыд,
Мургö тышлөн гым,
Мöдöд во нин мусö кöдзö
Сöмын шер да лым.
Щугөр толаясö пырис,
Воис төвся кад.
Кырныш чукөрöс тась зырис
Миян гөрд отряд.
Тэрыб вöv вылын Зарубин —
Повтöм командир.
Сылөн сабля, быттьö югөр,
Койö лэчыд дзирд.
Костя сы динö, но полö,
Чужöмыс тшötш дон,
А Зарубин:
— Кызди олан,
Щугөр сиктса зон?
— Босьтöй менö гөрд отрядад,—
Артмис сылөн друг.—
Сус пу кутас видзны ягын

Лыйлөм бательсь гу...
Лэччис вөв выльсь Зарубин:
— Ичөт на... Он туй!
Өд Сибирөдз өні вуджны
Кутам сьөкыд туй...
Коми йөзлы нянь сэсь ваям,
Тэ тшөтш лоан пөт.
Ленин тшөктіс вөчны тайөс,
А эз кодкө мөд!
— Бо-о-сьтөй!..
Ыджыд кыв ме сета,
Кодөс нэм ог вудж:
Корсьны батьө пыдди пета
Чужан мулы шуд.
Командирлөн нюмыс воссис:
— Со кутшөм тэ ён!
Сідзкө, босьт винтовка, Костя,
Щугөрсә смел зон!..

7

Витөд лун нин өти серпас:
Руд енэж да из,
Төдтөм вөралысьлөн керка,
Букыш Төв Поз Из.
Ой, Урал, тэ кутшөм шуштөм,
Турөбъяснад йөй!
Гөрд отрядлы туйсө кушты
И эн лымйөн вөйт.
Сійө кыссьө Обь ю дорөдз,
Көні Ляпин грезд.
Изъя ордымъяссө дорис
Помтөм кыксө верст.
Костя мудзис, но оз висьтав,
Мунны, мунны дась.
Мамыс сетіс сылы кыссьөм
Медбөръя важ пась,
Ставсө, керкаас мый вөлі,
Тшөтш и синва войт...
Енэж шөрын көдзыд төлысь.
Өзйө бипур.
Вой...
Турөб шутлялө зэв гора,

Оз төд мортлысь мудз.
Кодкө пуксис Костя дорө,
Шыөдчис:

— Он узь?..

Командирлысь гөлөс кылө,
Төдө сылысь ки.
— Шонді петтөдз зэв на ылын,
Ылын, дона пи!
Век жө воас сійө кадыс,
Кусас ыджыд кось.
Миян мулы шуд да радлун
Вир кисьттөг он корсь!
Сэк тэ книга босьтан, Костя,
Тшыг олөм он ну,
Ассьыс мичлун тэныд восьтас
Миян Коми му!..
Бипур дорын Костя узьө,
Аддзө мича вөт...
Сылөн нэмыс ёна кузь-ө...
Мыйла нө оз төд?

8

Өшйис миян вөр-ва весьтө
Гөгөрбокса грөз.
Ленин төждысьны сэк эшти:
Тшыг пө коми йөз!
Мөвпыс сылысь сьөлөм йирис,
Сэтчөдз стөч эз ланьт,
Кытчөдз Ляпинө Сибирись
Эз кылөдны нянь.
Гөрд отрядкөд Костя мунө
Пөртны ыджыд мог:
Коми муө пөтаслуныд
Пось кисьттөг оз лок!
Збыль мөй коркө югыд шонді
Восьтас зарни сыв?
Тшөтш и сійө,
Костя, пондас
Сьывны сьыланкыв,
Восьтас книга?
Оз кө сійө,
Гашкө, кодкө мөд...

Кутшөм лоасны выль пиян —
Костя, дерт, оз төд!
Квайтөд сутки кыссьөм бөрын
Зонлөн бырис вын.
...Лымйө сунөм вөр ді шөрын
Тыдовтчис съод тшын.
Командир Зарубин сувтис,
Сувтис и обоз.
Зонмөс аслас лапнас-увнас
Сывъялис дзор коз.
Мыйла войтыр кывйөн сійө
Сёрнитны оз куж?
Гөрд отряд эз пырны биө
Дзор Уралсө вудж!

9

Пеж Колчаклөн банда чукөр
Татчө вайис койт,
Тшыгла олысьлы нянь юкны
Эз, дерт, көсйы войт.
Эз пөсь няньөн да бур солөн
Ляпин нюжөд ки.
Лымъя эрдын таргис гора
Пулемётлөн би.
Костя сідз жө лыйлис, лыйлис,
Мынтис водзөс-дон.
Мыйла тайө көдзыд лымйыс
Лои биа-дон?
— Костя, бөрынтыч! — дерт, кылө,
Но оз кыпөд вын.
Кокыс, гөгөрвоис, сылөн
Лои кер кодь кын.
— Костя, вешйы бөрө! — кылө,
Но оз чеччы-сувт,
Пулемёт көть оз нин ылын
Дурмөм пон моз увт.
Командирыс дыр эз казаяв, —
Омөль ворсөм — тыш! —
Сылысь веськыд флангсө разис
Вөрөглөн ён кытш.
Тайө кытшас Костя коли:
Петны вөлі сёр.

Сы моз куйлісны сэн нельён,
Ранитчём нель ёрт.
— Кула татчө, но ог сетчы,
Джагав няньнад, зверь!..
Сэк жө пидзёс вылас лэччис,
Лымйё турбыльтчис да пессис
Еджыд офицер.

10

Эм быд шорлөн, юлөн, вислөн
Чужан йыв да вом.
Ог на пукты тайё висьтлы,
Дона челядь, пом.
Мёдысь овны, дерт, оз ловзыы
Щугорса смел зон...
Враглы козьнавны эз повзыы
Медбөрья патрон.
Сэк жө төвзис Ленин дорөдз
Коми мулөн шог:
Ыджыд воклысь отсөг корис
Вёрын олысь вок.
Вөлі вой, а гашкө, асыв,—
Висьтавны ог куж!—
Миян вождь эз лыда часөн
Артав ассьыс удж.
Буретш татшөм узьтөм кадө
Сійёс суис дой...
— Тадзи,— шуис,— миян радысь
Усьё том герой!..
Чөла мөвпалөмөн ветліс,
Мукөд дой эз кыв.
Пыр жө реввоенсоветлы
Гижис куим кыв.
Сылөн куим кывйыс, пьян,
Чардысь вөлі ён...

Оз, оз кувлы некор
Миян
Щугор сиктса зон!



ВАРЫШ ВАСЬ

1

Татшөм сиктыс Коми муын уна,
Кытшө босьтис кодъясөс веж яг.
Төдмасигмоз первойысь ме муна
Тэнад өшинь увті, Саваяг.

Тувсов войыс сьыланкыв кодь гора,
Оз и куслы кыаяслөн сер,
Вежтассянь мөд вежтасөдз Печора
Павтыртөма асьыс эзысь эрд.

Асьядорөдз эг эськө и вешйив,
Дзорги вөр-ва мичлун вылө дыр.
Кык кузь ниа
Саваяг сикт весьтын
Пост вылын моз сулалөны пыр.

Накөд орччөн, абу и зэв ылын,
Кыпөдөма юрсө ыджыд из.
Кыа ворсө сылөн көдзыд йылын,
Югдөдө важ гижөдторлысь визь.
Уна татшөм из Печора дорын
Казьтылөны чужан мулысь дой...
Кымын пилөн олөмыс тан ори
Сэк, кор врагкөд муніс сьөкыд бой!

Ниа бердө копыртыштөм юрөн
Сувтны меным оз өмөй нө ков?
«В. Шахтаров» гижөд төдчө бура,
Первойысь на кыла ним да ов.
Коді сійө?

Тэ эн чөв ов, ниа,
Аддзылін мый,—
ставсө меным восът,
Важөн көть нин мамыс ассьыс пиөс
Татшөм ылыс пельөсысь оз корсь.

Ловъя ме, и кытшовтны ог вермы
Веськодьпырысь өти братскөй гу.
Омөля мөй врагъяс свинеч шернас
Киськалісны менсьым чужан му?

Эз вөвлыны нимъястөм геройяс,
Кыдзи өні абу нимтөм морт...

Ой ті, эзысь, вунөдлытөм войяс,
Вөрлөн-валөн чөв усълытөм гор!
Лэччыла Печора берег дорө,
Көні өзйө бакенщиклөн би.
Гашкө, кыкөн шонді петан дорөдз
Варовитны бара сяммам ми.

Кодкө өмөй төдліс гөльысь нужа,
Сылысь синва, сылысь сьөлөм дой!

Аслам батыө вывті гөля оліс,
Васьлөн батыыс ещө вөлі гөль.
Вит душ вылө, гашкө, өдва воліс
Йөра куысь өти киссьөм воль.

Өні кө, дерт, босьтіс зонмыд книга,
Школаын тшөтш лои медся сюсь.
Сэтчө туйсө пыкліс сьөкыд иган,
Коді дыр эз воссый да эз усь.

Грамота ми корсим пемыд вөрысь,
Лыддыны сэсь велалім быд пу.
Сьөлөмъясысь төдліс ыджыд скөрлун
Сөмын парма, миян войвыв му.

Тадз ми быдмим мам-Печора дорын,
Тадзи быдмис миян Варыш Вась...

Тувсов гымөн,
Йиркөдчана горөн
Пырис коми йөзөс мездан власть...

Ниа бердын сулаліс часовня,
Кадыс сійөс талунөдз эз видз.
Паметьын мед сөмын кутас овны
Саваяглөн важ серпасысь «мич».

Енлы, дерт, ми ичөтсянь эг эскөй,
Некор сійө бурторсө эз вөч.
Копрасьлісны пез чужөмъяс весьтын
Выживмыны пондөм дед да пөч.

Варыш Васьө быд ворсөмын нырщик,
Тырмывліс тай сылөн лэчыд сям!
Тані ми и мачасьывлім пырджык,
Мам-Печора кодыр эз на ям.

Но кор сійө нювсис лыа бердын,
Пыжө ассьыс гыяссө эз кой,
Колльөдлім ми өтвылысь лөз эрдын
Дзоридзясөн өвтысь шоныд вой.

Ог, ог вунөд ассым муса ёртөс,—
Абу өд нин ылын нэмлөн пом!—
Синъясас пыр шонді югөр ворсіс,
Өзйис быттьө сэн кык биа шом.

Менам висьтыд, ачылд кылан,
кузь өд,
Сылөн помыс ваяс сөмын шог...
Пельпомланыө инмөдчис дед:
— Узян?..
Бипур вылысь синмөс вешті:
— Ог!..

Висьтав, висьтав, мый нө водзё лои,
Кыдзи усис тэнад Варыш Вась?
— Казьтышти нин,
кыдзи татчө воис
Гөрд Октябрөн чужтөм миян власть.

Морөсас гөрд лента Васьё вурис,—
Дас вит арөс эз на көть и тыр,—
Озыръяслысь эмбур босьтліс бурөн,
Эз кө сетны,— сійөс юкліс мырд;

Отсаліс комбедлы юкны муяс,
Дөваяслы вөрысь вайны пес...
Татшөм смел да татшөм повтөм туйө
Ляб сьөлөма эз эськө, дерт, пет!

Ми көть ськөд ичөт дырсянь ворслім,
Завидьлунөн өзйис челядь син,
Өти лунө аддзим кодыр ёртлысь
Эг ньөв пищаль — збыльысь карабин.

Шуштөм сёрни сиктьяс пөлөн муніс,
Вашкөдчисны:

«Энлөй... воас кад!..»
Сійө лунсө некор ме ог вунөд,
Локтіс кор Тетеринлөн отряд.

Гыаліс Печора еджыд гыөн,—
Ме дінө тэ өні лэччин кыт,—

Варыш Васькөд медбөръяысь кыкөн
Колльөдім водз воом көдзыд рыт.

Дөзмөдчигтыр шөйтис пуяс костөд
Парма сайсянь өвтысь йирмөг төв...
Өта-мөдлы тайө рытө восьтім
Олөм йылысь уна мича мөвп.

— Колө мунны...— шуис ниа улын,—
Виччысьө и тэнө шоныд горт...
— Сувтны тайө войө караулө
Индіс меным тшөтш Тетерин ёрт.

Вешыштіс и пемыд руас вөйи,
Вошө кызди бипур весьтысь кинь...
Тайө войө уна-уна көин
Жергөдісны ассыныс ёсь пинь.

Кывлінныд, дерт, мый сэк тані лои,
Сэтшөм вөлі, зонмө, сьөкыд кад!—
Көин чукөр гусьөн пемыд войын
Бырөдіс Тетеринлысь отряд.

— Чөвлы, дедө...
Лолыштны вай сетлы,
Аддза, луныс локтө кутшөм бур!
Отвылысь вай гу дорас ми ветлам,
Усьөм йөзлы копыртлам тшөтш юр.

— Тэ эн тэрмась...
Висьтала нин помөдз,
Кызди уси смел сьөлөма зон,
Медым найө, кодъяс өні томось,
Төдісны выль олөмыслысь дон.

Тышкасьны мед кужисны и овны,
Радейтісны ассыныс том му...
Важөн киссис мяян важ часовня,—
Мортлөн подвиг нэмъясын оз кув!

Буретш сэк, кор сиктысь гора лыйсьөм
Кылім тайө шуштөм войө ми,

Кодкө восьтіс важ часовня вывсянь
Көинъяслы жер воманыс би.

Тайө вөлі Васьө...

Миян Васьө,

Миян кодь жө арлыда збой зон!
Рытсыныыс од сылөн вөлі дась нин
Быд бандитлы тырмымөн патрон.
Но кор ставыс асьядорас быри,
Коли өтнас тыртөм карабин,
Горөдіс часовня вывсянь:

— Пырөй,

Тіянысь оз лапмун менам син!..

Помнита,

кыдз нуөдісны сійөс

Сэтчө, көні руаліс съод гу...
Татшөм здукуыс некор, дона пиөй,
Мортлөн зумыд паметъысь оз кув.

Варыш Васьө вөлі көмтөм, пасьтөм,
Синмыс лөглун бинас помтөг яр.
Штыкъяс костын восьлалігөн Васьө
Горөдіс «Интернационал...»
«Это есть наш...»—

юргис челядь гөлөс.—

«Наш последний...»

наш последний бой...»

Штыкъяс йылас, кажитчис мен, вөлі
Сьыланкывйысь орөдөм кык войт.
Вот и ставыс...

Өні вай жө ветлам

Сэтчө, көні куйлө менам өрт.

Өти шонді му гөгөрыс ветлө,
Шуда овлө сөмын повтөм морт.
Тайө шудсө колө кужны видзны,
Дорйыны мед сійөс быдөн дась.
Миян вылө керөс йывсянь —
видзөд!—

Сюся дзоргө ачыс Варыш Вась.



МЕ ВӨЛІ РАКЕТЧИКӨН, МАМӨ

1

Ме вөлі ракетчикөн, мамө,
И гортад эг веськав кө бөр,
Тэ ланьтөдны сьөлөмтө сяммы,
Пось синванад, дона, эн бөрд...
Салдатыдлөн службаыд сэтшөм:
Көть пуксьывлө му вылө мир,

Границаяс видзиг оз этша
Пыр киссьывлө кодлөнкө вир.

И колө жө сідз вөлі лоны...
Ме ставсө тэд висьтала, мам,
Мед ме вөсна яндысьтөг олін,
И шудлуныд некор эз ям.

Вай синватө чышжав... Ме төда,
Кызд пыдзыртө сьөлөмтө шог,
Но ёнджыка радейтны мөдам
Ми ассьыным Дальньої Восток,
Көн шондїыс медся водз петө,
Но медся водз локтө и вой.

Сэн сулалө менам ракета,
Но биа шер сійө оз кой:
Лөз енэжлань вөр пөвстсянь дзоргө,
Мед выль Чингисханыд оз дур;
Пыр вевттьыны дась аслас бордйөн,
Көть ылыс, но дона Амур.

Ог пет нин ме выль караулө,
Збой ёртъяскөд орччөн ог мун.
Тан, нейджыд памятник улын,
Ме аддзи нин палявтөм ун.

Ёсь дойыс и ёртъясөс личкө,
Оз быр налөн сьөлөмысь шог,
Но казътыштас быд перекличка,
Мый тшөтш пөрта олөмө мог.
Комбат петас водзө:— Бушуев?..
Чөв ланьтлас салдатъяслөн строй,
Но медводзын сулалысь шуас:
«Пыр мянкөд орччөн Герой!..»

2

Ой, мыйта тэд висьтавны колө,
Бур сьөлөма, меддона мам!..
Быд мам сетө челядьлы олөм,
И вежөр, и морттуй, и сям.

А тэ вöлiн мам дорысь унджык —
Учитель и медматыс морт.
Збой олöмö пиыдлы вуджны
Тэ козьналiн зэв унатор.

Пыр помнита, некор ог вунöд,
Мый вунöдны некыдз оз позь:
Выль школаö кыкөн ми мунам,
А асылыс вывті на водз.
Виж коръясөн коясьö арыс,
Со пөрччөдö паркысь быд пу.
Ме шуда... Мем стöч сизим арöс,
А челядь дыр — дерт жö нин шуд.

Тэ шыльöдан юрсиöс кинад
И радлунтö ассыйд он дзеб,
Кор велöдан:— Книгатöг, Дима,
Бур мывкыдыд мортлы оз шед...
Ме кута букварь, а тэ — дзоридз,
Он öтиöс — быдса букет.
Тадз сулалам выль школа дорын,
Учительным кытчөдз оз пет.

А сійö дзык тэ кодь жö мелі,
Пыр помнита сылысь пöсь сыв.
Со гижны нин велöдö мелөн
Быд сьөлөмлы медматыс кыв.

Дерт, сьökыдкодь медводдза воськов,
Но дзык некор сійö оз вун:
Тадз пиыдлы олöмыд воссис,
И медводдза велөдчан лун.

3

Ме чужи, кор му пытшкö йиджис
Став вöвлөм войнаяслөн вир,
И медводдза кыв, кодöс гижы,
Ме гижы тетрадь мышкö — «МИР».
Мед сэк эз на судзсьывлы вежөр,
Кыдз донъявны дженъыдик кыв,
Но «Мед олас шонді да енэж»
Ми радейтлім сыланкыв.

Од садикын сійӧс на сывлім,
Тшӧтш сэтчӧ ме котралі кор.
Быд мам, чайта, унаысь кывліс
Пӧсь сьӧлӧмсӧ вӧрзьӧдантор.

А воясыд кывтісны бӧрӧ,
Выль тулыстӧ вежліс выль ар.
Мем кажитчӧ, быттьӧ на тӧрыт
Ухта шӧрад лӧсьӧдім парк.
Быд пу сәні вежӧдӧ бара,
Выль керкаяс ләптӧ бетон,
И котӧртӧ шондіа карӧд
Дзик ме кодъ, но мӧд мамлӧн зон.

Мед быдмӧны зонъяс да нывъяс,
И быдӧнкӧд восьлалӧ шуд!
А бурджык да мичаджык кывъяс
Ме бурсины налы ог куж.

4

Ухта... Синмӧс куны, но аддза
Том карлысь быд паськыд проспект.
Водз асывсянь зарниа раддзӧн
Пӧсь шондіыс восьлалӧ сэт.

Эм му вылад каръясыд уна,
Но ас карысь бурджык оз ков.
И та йылысь гораа шуны
Ме ичӧтсянь, мамӧ, эг пов.
Став кодзувъяс чукӧртіс сійӧ
Да ас весьтас ӧшӧдліс тыр.

Со паркным... Со школаным миян,
Кӧн прӧйдитіс став челядь дыр.
Ме велӧдча медбӧрья классын
Да бӧрья нин олӧмӧ туй.
Лӧз енэжыс ми весьтын ясыд,
Оз сьӧд кымӧр миланьӧ уй.

И прӧст кад кӧ веськавлас коркӧ,
Эг воштылӧй ни ӧти здук.

А кодї нө збой комсомолкөд
Пось сьөлөмсө шөри оз юк!
Кор радейтан сынөд и шондї,
Сэк муртасьны вынөн он пов.
Ме тан, аслам школаын пондї
Пыр чорзьөдны лы-яй да лов.

Көть чужим ми зэв кыпид кадө,
Кор пуксьыліс му вылө мир,
Но пөльтчисны складъяс снарядөн,
Мед бара нин кисьтыны вир.

Да, пасьясны мукөдъяс коркө
И кыпид, и медсьөкыд нэм...
Өд му шарлысь шудлунсө торкны
Эз ковмывлы вежөра вем.
И та вөсна корө быд пиөс
Военной комиссариат...
Со тадзи и ме босьті киө,
Мед дорйыны мир, автомат...

5

Ми сывъясим, мамө, зэв пөся,
Да, медбөрын, орөдїм ки...
Сэк, йөз пөвстын, некыдз оз лөсяв,
Мед синвасө петкөдліс пи.
А мыйла, збыль, яндысьны сысь,
Мый сульвлө торйөдчан шог?

Скөр морелөн гымалөм шыөн
Со матыстчө Дальной Восток.
Ой, кутшөм тэ паськыд, Россия,
Став муясысь меддона му!
Пыр чуймөдө тэнсьыд быд пиөс
Быд кар, ыджыд стройка да ю.

Мед сувтлытөг поездным төвзьө,—
Оз сибавлы син бердө ун,
Кузь войясө сөмын нин ловзьө
Ухта шөрад колльөдчан лун.

Мый мөвпалі зэв ыджыд туйын,
Кор аддзи Россиялысь вын?
Сибирса лөз енэжөд уйис
Заводъяслөн помасьтөм тшын.
Ме висьтала өтнадлы, мамө,
Мый думайті туй вуджиг чөж:
И менам эм, кажитчө, сямөй,
Но нинөм на бурсө эг вөч.
Да-й верми-ө ме мыйкө вөчны,
Мед шуисны ошкана кыв!
Выль каръясөн му эг на вөччөд,
Эг гөр, эг на кыскывлы тыв,—
Ме сөмын на лосьөдчи овны
Да тэныд тшөтш содтыны шуд...

Эн бөрд, ме кө абу нин ловъя,
А выль олөм овны ог чуж...

6

И колө жө тадз вөлі лоны...
Дерт, тэнад, мам, шогыд эз быр,
Кор пиыд оз төлысь, а во нин
Оз гиж нинөм, чөв олө пыр.

Но ме пыдди гижасны мукөд,
Кыз кужасны, гижасны сідз.
Тэ налысь став письмөяс чукөрт
Да менө моз нэм чөжыд видз.

Эг врагъяскөд паныдась тышын
Да виччысьтөм пуляысь усь.
Тан, зэв джуджыд сопкаяс кытшын,
Ракетчыкыд, мамө, оз узы!
Границатө потшөма бура,
Оз вудж сійөс ни өти чөрт...
Веж гыясөн миян Амурыд,
Кыз овлө, эз омляв да вөр.
Мөд гожөм нин служба ме нуи,
И төдан-ө, кыз лои рад,
Комбат кодыр строй водзын шуис:
«Бушуевлы отпускө кад!»

Ракетчиклы отпускыд — праздник,
Бур службаысь сетёны кор,
И тэ менё ас дінсьыд аддзин,
Дзик нинём кө туйёс эз торк.
Билет куті кыын... А луныс

Водз асывсянь лои зэв жар.
И, ме чайта, некод оз вунёд
Тревогалысь шысё:— Пöжар!..

Морт повзъывлө виччысьтөм горысь,—
Ракетчиклы повны оз позь...
Ме аддзи ракетаяс дорысь
Гöрд биыскöд сывъясьöм коз.

Веж пармаыс лолаліс тшынөн,
Би тэрыба паськаліс пыр,
И, кажитчис, юр весьтын сынöd
Дон биыскöд лои нин гырд.

7

— Тревога!.. Тревога!..

— Тревога!..

Казармаысь öдйöджык пет!
Ме сулала... Видзöда гөгөр
Да кута транзитной билет.

Збой ёртъясöй черөн да зырьён
Лёк биыскöд панöны вен.
А меным тшötш оз öмöй тырмы,
Друг думышти, местаыс сэн?

Эг зыр помö кутчысь... Гаражын,—
Ме мөвпыштны водзджык эг куж!—
Бульдозерным сулаліс важөн
Да виччысис аслыс тшötш удж.
Приказ сійёс петкöдны колö...
Но виччысьны тшöктöмсö кор?

Атакаö уськöдчан горён
Машиналөн ловзис мотор.

Ме петкөдi вөр дорö сiйöс
Ен амысьнас вундыны туй,
Мед адын моз ыпъялысь биыс
Ракеталань, водзö, эз уй.

А письтiс кө сы дiнö биыс?
Мед некод, мый лои, оз тöд...
Ме босьтi рычагъяссö киö
Да содтi бульдозерлы öд.

Эз сисьяс моз гылавны пуяс,
Кöть ыпъялис налөн быд рос.
Друг кыли:— Бушув!.. Бушув!..
Вай öдйöджык би пытшкысь кос!..

Эг подвигөн чуймöдны көсйи
Ме ассьым смел ёртъясöс, мам.
Кор сьөлöмыд тыш вылö öзъяс,
Сэк некод оз овывлы рам.

А збыльысь кө веськыда шуны,—
Дзик нинöмтор тэысь ог дзед,—
Пыр кокниджык öтилы кувны,
Но мукöдъяс олöны мед!

Но та йылысь мөвпалан кадыс
Сэк, дерт, менам ньöти эз вöv...
Эз му вывтi — збыль биа адöд
Крут сопкаяс вуджис көрт вöv.

И сэк, тайö медсьöкыд здукö,
Друг чöv ланьтiс сылөн мотор...
Машиналөн сьөлöмас тшуки
Нем жалиттöм биыслөн борд...

Ме уськөдчи ловзьöдны сiйöс,
А доналöм ключ сотiс киöс...
Но сiйöс ме эг öд нин кыв,
Кыз ыпъялысь дявөлöс виис
Кык сьөлöмлөн öтувъя взрыв...

Ракетчикъяс лэптисны менö,
 Но вом дорöй вöли нин кын,
 А усьöмöс ловзьöдны эм-ö
 Став мувывивса врачьяслөн вын?

Ме сы вöсна пыр шогси сöмын,
 Мый нэм чöжөн нинöм эг вöч...
 Амур весьтын кыалөн рöмыс
 Мед пыр лоас югьд да сöдз!

Тан медся водз кыпöдчö шондi
 Да сывъялö лöся быд пу.
 Печораса сиктясысь зонъяс
 Тан видзöны миянлысь му.

Тэ некор эн эскы, бур мамöй,
 Кор лэптасны лёк нога вен,
 Мый öнiя том йöзлөн сямыс
 Да смеллуныс этшаджык эм.

Ме, ковмас кö, кыпöдча гуысь
 Да морöсөн пыка выль би.
 И тадзи жö вöчас, ме тöда,
 Быд бать-мамлөн ме кодъ жö пи...

А татшöм веж петасыд эм кö,
 Оз косьмы и пуыдлөн вуж.
 Россияöс жугöдны менсьым
 И выль Чингисханыд оз куж!

ЮРИНДАЛЫСЬ

Щугӧрса зон	5
Варыш Вась	14
Ме вӧлі ракетчикӧн, мамӧ	21

*Для среднего и старшего
школьного возраста*

Серафим Алексеевич Попов

ПАРЕНЬ ИЗ ЩУГОРА

*Поэмы
На коми языке*

Художник С. А. Холопов

* * *

Редактор В. А. Попов

Худож. редактор М. П. Безносков

Технический редактор А. Н. Вишнева

Корректор М. М. Дейнега

Сдано в набор 22|XII-1967 г. Подписано
к печати 4|III-1968 г. Бумага № 1.

Формат 84×108¹/₃₂. 0,5 бум. л., печ. л. 1,64,
уч. изд. л. 1,3 Тираж 4500.

Заказ № 167. Ц00248. Цена 8 коп.

* * *

Коми книжное издательство,
Сыктывкар, Дом печати.

* * *

г. Сыктывкар, Республиканская типография
Управления по печати
при Совете Министров Коми АССР

**ТАТШӨМ КНИГАЯС ЛЭДЗӨ
ШКОЛАЫН ВЕЛӨДЧЫСЬ
ВОЙТЫРЛЫ
КОМИ КНИЖНӨЙ
ИЗДАТЕЛЬСТВО 1968 ВОЫН**

Леонид ПАЛКИН. Ракета. Кывбур.
Рочөн. Челядь йылысь, кодъяс шуисны
керка дораныс вöчны ракета, мед лэбны
Космосö.


Альберт ВАНЕЕВ. Йöра пи. Кывбур.
Рочөн. Йöра пи йылысь, кодi мамтöг
кольöм бöрас веськалiс сиктö. Быдмис
сiйö да мунiс вөрö, но и сы бöрын
йöра кутiс воливлыны йöз дiнö, челядь
дiнö.

Пантелеймон ОБРАЗЦОВ. Родник.
Кывбуръяс. Рочөн. Лирической кывбуръ-
яс мян вөр-ва йылысь.

Серафим ПОПОВ. Лысва войт.
Кывбуръяс. Комиён. Кывбуръяс сы йы-
лысь, мый овлö-вöвлö мян пармаын.

Василий ЖУРАВЛЁВ-ПЕЧОРСКИЙ. Раз-
ры в - тра в а. Висьтъяс. Рочөн. Гижысь-
ыс аслас висьтъясын нуöдлö мян-
нös вөрö, тыяс да юяс дорö, чери кый-
ысьяс да вöралысьяс дiнö, тöдмöдö пар-
ма йöзлөн вöвлöмторъяскöд.

Василий ЮХНИН. Би а н ю р. По-
весть. Рочөн. Сы йылысь, кызди ве-
лödчысьяс Сеня Майбуров да Митя Куш-
манов восьтiсны биа нюрлысь гусяторсö.



10 р.

8 коп.

КОМИ КНИЖНОЙ ИЗДАТЕЛЬСТВО 1968